

Setahun PKP: Antara kudrat, air mata dan pengorbanan
Astro Awani
18 Mac 2021
Harits Asyraf Hasnan

SETAHUN yang lalu, 18 Mac 2020, bermula Perintah Kawalan Pergerakan (PKP) yang dikuatkuasakan di seluruh negara tatkala Malaysia ketika itu merekodkan 790 kes positif COVID-19.

Objektifnya hanya satu, mengawal impak penularan pandemik COVID-19 terhadap kesihatan serta keselamatan rakyat.

PKP yang pada asalnya selama dua minggu kemudian berlanjutan hingga 1 Mei diikuti PKP Bersyarat (PKPB) yang telah memberi sedikit pelonggaran kepada pergerakan rakyat.

Ini tujuan kerajaan melaksanakan Perintah Kawalan Pergerakan – PM

Pengumuman yang dibuat pada 16 Mac itu telah menyebabkan berlakunya pembelian panik dalam kalangan pengguna.

Ia meliputi larangan menyeluruh pergerakan dan perhimpunan ramai di seluruh negara termasuk aktiviti keagamaan, sukan, sosial dan budaya.

Semua rumah ibadat dan premis perniagaan diarah tutup kecuali pasar raya, pasar awam, kedai runcit dan kedai serbaneka yang menjual barangan keperluan harian. Sekatan menyeluruh rakyat Malaysia ke luar negara, pelancong dan pelawat asing turut disekat masuk ke dalam negara.

Dari tadika sehingga ke institusi pengajian tinggi turut ditutup, sekali gus memaksa perubahan dalam pendekatan pengajaran dan pembelajaran.

Istilah kunjung-mengunjung, balik kampung semasa perayaan dan upacara keramaian seperti perkahwinan dan majlis pengebumian juga terpaksa dilupakan buat sementara waktu semasa PKP.

Namun, pandemik COVID-19 telah memberi kesan yang amat besar bukan sahaja kepada rutin harian, tetapi juga kelangsungan hidup, sumber pendapatan dan segenap aspek kehidupan.

PKP Diperketatkan (PKPD) turut dilaksanakan di beberapa kawasan yang merekodkan kes positif yang tinggi terutama dalam kalangan komuniti.

Walaupun pelaksanaan PKP telah membuatkan pertumbuhan sektor ekonomi tergendala dengan rakyat terpaksa hidup dalam keadaan norma baharu, namun ia terbukti berjaya membendung penularan kes baharu COVID-19.

Ini hasil tekad setiap antara rakyat di negara ini dalam memastikan wabak ini dibendung sepenuhnya.

Detik sukar ini dilalui sebilangan besar rakyat Malaysia dengan air mata tatkala nyawa jadi taruhan, hinggakan insan tersayang dijemput Sang Pencipta.

Para petugas barisan hadapan yang bekerja keras, tanpa kira masa dan kudrat terus diberi penghargaan.

Hingga satu ketika, Malaysia berjaya merekodkan sifar jangkitan tempatan. Namun, Pilihan Raya Negeri Sabah serta membenarkan semula pergerakan rentas negeri menjadi antara sebab peningkatan semula kes COVID-19.

Perkara itu diakui sendiri oleh Perdana Menteri Tan Sri Muhyiddin Yassin.

Semenjak bermulanya penularan wabak COVID-19, kerajaan telah melaksanakan lapan siri pakej rangsangan ekonomi bernilai RM663.5 bilion.

Tujuan utama pastinya untuk membantu rakyat, perniagaan selain melindungi ekonomi.

Setahun berlalu, perjuangan melandaikan keluk COVID-19 masih berterusan. Rakyat terus memberi harapan agar Program Imunisasi COVID-19 Kebangsaan bakal membawa sinar kepada kehidupan dan pembangunan Malaysia yang lebih baik.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-malaysia/setahun-pkp-antara-kudrat-air-mata-dan-pengorbanan-288599>